

Kingusinnerpaamik UPA12-mi suliariumannittussarsiuussinermi misissuinnermik saqqummiussinissamat Naalakkersuisut peqquneqarnissaannik Inatsisartut aalajangiiffisassaattut siunnersuut, paasiniarlugu suliariumannittussarsiuussinerni aningaasatigut allaffissornikkullu sipaartoqarsinnaanersoq, suliani ullumikkut Namminersorlutik Oqartussanit aamma Namminersorlutik Oqartussat suliffiutaannit ingerlanneqartartuni. Misissuinnermi aamma siunertaassaaq suliat pisortanit ingerlanneqartartut sorliit namminersortunut imissutigineqartarsinnaanersut nassuiarnissaat tikkuarnissaallu aamma sipaarutaasinnaasut taggillugit taamaasilluni suliat ukiup tullianut aningaasanut inatsisissamat ilanngunneqarsinnaalersillugit.

(Inatsisartunut ilaasortaq Niels Thomsen, Demokraatit)

Akissuteqaat, siullermeerneqarnera

(Naalakkersuisut Siulittaasuat)

Siullermik aallaqqaasiutigalugu Naalakkersuisut sinnerlugit siunnersuut pingaaruteqartorujussuaq pillugu qujassaanga.

Akileraarneq Atugarissaarnerlu pillugit Isumalioqatigiissitap inassutaanut uiggiullugu Naalakkersuisut pingaartitorujussuaat, siunissami qanoq-iliornikkut inuiaqatigiinni kalaallini pitsaanerusumik oqimaaqatigiinnerulernissap anguneqarnissaa. Inuiaqatigiinni oqimaaqatigiinnerunissap anguniarnerani inassutit ilagaat, inuiaqatigiit atugarissaartut aningaasalersornissaannut tungavissaq annertunersoq namminersorlutik inuussutissarsiteqartunit tungavissinneqassasoq.

Suliariumannittussarsiuussinernerup ingerlarnaga suliassap suuneranik oqaluttuarnermik aallartikkajuttarpoq, suliariumannittussarsiuussisoqartarpoq, tamatumalu kingorna naliliisoqartarpoq, neqerooruteqartoq sorleq suliarnik pitsaanerpaamik akikinnerpaamillu suliariumannissinnaanersoq. Nunani tamalaani misilittakkat takutippaat, suliariumannittussarsiuussinermi aningaasaqarnikkut allaffissornikkullu iluanaarutit nalinginnaasumik annertuumik ingerlataqarnikkut iluanaarutissartaqartartut, imatut paasillugu, pisiniarneq suliassanilluunniit isumaginninneq pisiffigisanit sullissisunilluunniit ikinnerusunit annertuunilli pisarineqarpat sularineqarpalluunniit. Kalaallit Nunaanni suliffeqarfii mikisut akunnattumillu angissusillit ineriartornissaat siunertarineqarmat, suliariumannittussarsiuussisarnermi piumasaqaatit naleqqussartariaqarput, taamaasilluni suliariumannittussarsiuussisarnermi inuiaqatigiinnilu siunertarineqartut pisortat aningaasartuutaat annertoorujussuanngortinngikkaluarlugit isumagineqarsinnaaqqullugit. Taamaasiorneq oqimaaqatigiissaarinissamik piumasaqaatitaqarsinnaavoq. Taamaattumik aamma qulakkeerneqarsinnaangilaq, suliassaqaarfiup nuutsinneqariataarsinnaanera piffissap sivikitsup iluani sipaarutissanik takussaasunik Aningaasanut Inatsimmi takussutissaqalernissaa.

Namminersorlutik Oqartussani aammalu ingerlatseqatigiiffinni Namminersorlutik Oqartussanit pigineqartuni suliariumannittussarsiuussisarnermi killissarititat assigiinngiaarput. Ataatsimut isigalugu tamatumunnga pissutaanerpaavoq, Namminersorlutik Oqartussat pisortani malittarisassanik arlalinnik innuttaasut suliffeqarfissuillu inatsisitigut isumannaatsuunissaannik malinnittussaataanerat. Taamaattumillu aamma suliariumannittussarsiuussinernerup iluanaarutissartaqarsinnaaneranut tungatillugu suliffeqarfissuit assigiinngitsunik nalilersuisariaqartarput. Pisortat suliffeqarfissuillu

pisortanit pigineqartut suliaasa ataqatigiissarnissaat anguniarlugu, tamatumunnga ilutigitillugu attanneqarsinnaasumik ineriartortitsinermi piumasaqaataavoq, allanngoriartornerit ukiuni aggersuni pisussat ataatsimut siunnerfeqarnissaat.

Naalackersuisut tamanna tunngavigalugu pisortani pisiniartarnermut politikkip pisariaqarnerpaartaat pillugit misissueqqissaarnissaq aallartissavaat, tassunga ilanngullugu suliariumannittussarsiuussinermi iluanaarutaasinnaasut. Tassunga atatillugu pingaaruteqarpoq, misissuinermi kommuunit sapinngisaq tamakkerlugu peqataatinniarneqarnissaat, kommuunimmi tassaammata pisortat sullissineranni annertuumik sullissisuusut pisortallu pisiniartarneranni annertuumik pisiniartartuusut.

Naalackersuisut aamma isumaqatigaat, siunissami periarfissanik misissuinnissat ataatsimut siunnerfeqarnissaat, taamaasilluni suliariumannittussarsiuussisarnermut pisortallu pisiniartarnermut politikkiannut atatillugu inuiaqatigiit aningaasaqarnerannut kingunerisinnaassai ilanngunneqartussanngorlugit.

Inuiaqatigiinnut iluaqutaasumik pisortani ingerlatsinermi pisiniartarnermut politikkimik allanngortitsinissamut periarfissaqassappat, Naalackersuisut ingerlaavartumik pininnaasartik naapertorlugu periarfissarsiuussisassapput, aamma suliniutissat siunertamut naleqquttut ingerlaavartumik aallartinniartassavaat.

Tamanna nunap immikkoortuini ineriartortitsinermit iliuusissat pillugit nassuiaammi isumaliutigineqartunut, Inatsisartut UPA 2011-mi oqaluuserisassaannut ilaasumut, tulluarpoq. Nassuiaammi tassani ilinniarfiusinnaasunik pilersitsiortornissamik siuarsaanissaq anguniarlugu pisortat pisiniartarnermut politikkiata suliaannut tulluarsarnissaa ilaatigut taakkartorneqarpoq. Naalackersuisut kissaatigaat tamanna periaaseq ilanngullugu nalilersuiffigiuaannarneqassasoq malinnaaffigalugulu.

Suliffeqarfissuarnut tamakkiisumik ilaannakortumilluunniit Namminersorlutik Oqartussanit pigineqartunut tunngatillugu, taakkua suliffeqarfissuup pitsaanerpaamik akikinnerpaamillu ingerlanneqarnissaa anguniarlugu namminneerlutik aalajangertarpaat, qanoq annertutigisumik pisiortorfinnik avataaniittunik atuinissartik. Naalackersuisulli maannakkut suliffeqarfissuarnut tamakkiisumik ilaannakortumilluunniit Namminersorlutik Oqartussanit pigineqartunut tunngatillugu suliffeqarfissuarnut politikkipissamik, suliffeqarfissuarnut tunngaviumik killiliussanik ersarissaasussamik suliaqarput. Maannangaarli ersarissereerpoq, namminersorlutik inuussutissarsiortunut iluaqutaasussamik suliffeqarfissuarnut politikkipissaq suliffeqarfissuarnut naleqquttumik killiliussanut piumasaqaatinik ilaatigut imaqartariaqartoq. Taassuma saniatigut suliffeqarfissuit inuiaqatigiinnut akisussaaffeqarnerat pillugu apeqqut nassuiaasiassami ilanngunneqassaaq. Suliffeqarfissuarnut politikkipissaq pilersaarut malillugu UKA 2011-mi saqqummiunneqassaaq.

Taamatut oqaaseqarlunga, siunnersuutip akuersissutigineqarnissaa Naalackersuisut isumaqatigigaat oqaatigissavara, siunnersuutillu aappassaaneerlugu suliarineqannginnerani atatsimiititaliami suliarineqarsinnaanera eqqarsaatigalugu Inatsisartuni oqallisigilluarneqarnissaa siunnerfigalugu.